



CIRCULAR MA-01-2019 DA DIRECCIÓN XERAL DE DESENVOLVEMENTO PESQUEIRO, POLA QUE SE DITAN INSTRUCIÓN S PARA A PRESENTACIÓN DE PROPOSTAS DE PLANS DE NOVA INCORPORACIÓN DE RECURSOS XERAIS EN ZONAS DE AUTORIZACIÓN E PARA ZONAS DE LIBRE MARISQUEO MEDIANTE PLANS ESPECÍFICOS PARA O ANO 2020

Esta circular ten como obxectivo facilitar a elaboración e presentación das propostas de plans de xestión de nova incorporación de recursos marisqueiros xerais por parte das agrupación s sectoriais e entidades asociativas do sector para o ano 2020.

O día 09/12/2019 tivo lugar a publicación do Decreto 153/2019, do 21 de novembro, polo que se regula o réxime de conservación e explotación dos recursos marisqueiros e das algas.

Unha das principais novidades da norma é o establecemento de plans de xestión de marisqueo de vixencia trianual, nos que xunto á planificación da explotación dos recursos, terase en conta aspectos de carácter medioambiental e socioeconómico, asociándoos a uns obxectivos xerais no plan. Así mesmo, a norma recolle que os plans de recursos xerais do ano aprobados para o 2019 ven prorrogada a súa vixencia ata o 31 de decembro de 2020, data trala cal terá inicio o primeiro período de plans trianuais (2021-2023 para os recursos marisqueiros xerais).

No artigo 19 do Decreto 153/2019, do 21 de novembro, régúlase a figura dos plans de xestión de nova incorporación, que as entidades poderán presentar para un período inferior a tres anos para recursos, ámbitos zonais ou útiles, equipos e técnicas de marisqueo regulamentarios, diferentes aos plans de xestión trianuais aprobados, e que se poderán aprobar para determinar a viabilidade da explotación antes da súa aprobación como plan de xestión trianual e incorporación ao Plan Xeral de Explotación Marisqueira.

De acordo con isto, na disposición transitoria cuarta do Decreto 153/2019, do 21 de novembro, contéplase que se poderán presentar plans de xestión de nova incorporación de recursos xerais para o ano 2020, no prazo dun mes contado desde o día seguinte ao de publicación.

NORMATIVA DE REFERENCIA PARA A PRESENTACIÓN DAS SOLICITUDES DOS PLANS DE XESTIÓN:

- Decreto 153/2019, do 21 de novembro, polo que se regula o réxime de conservación e explotación dos recursos marisqueiros e das algas.
- Decreto 15/2011, de 28 de xaneiro, polo que se regulan as artes, aparellos, útiles, equipos e técnicas permitidos para a extracción profesional dos recursos mariños vivos en augas de competencia da Comunidade Autónoma de Galicia.
- Orde do 20 de decembro de 2018, pola que se aproba o Plan xeral de explotación marisqueira para o ano 2019.





- Lei 39/2015, de 1 de outubro, do Procedemento Administrativo Común das Administracións Públicas.

A. PRESENTACIÓN E CONTIDO DOS PLANS DE XESTIÓN DE NOVA INCORPORACIÓN DE RECURSOS XERAIS PARA O ANO 2020.

1. Poderanse presentar propostas de plans de xestión de nova incorporación para o ano 2020, para recursos, ámbitos zonais ou útiles, equipos ou técnicas de marisqueo regulamentarios diferentes aos de vixencia prorrogada, no prazo dun mes contado desde o día seguinte ao de publicación do Decreto 153/2019, do 21 de novembro, de acordo coa disposición transitoria cuarta.

Tendo en conta a data de publicación da norma, **poderán presentarse propostas de plans dende o 10/12/2019 ata o 09/01/2020.**

2. As **solicitudes** presentaranse a través da SEDE electrónica da Xunta de Galicia <https://sede.xunta.gal> a través do procedemento **PE403A- Plans de xestión de marisqueo.**

As solicitudes virán asinadas pola persoa que exerza a representación legal da entidade e no caso dos plans conxuntos, polo representante legal da entidade nomeada como representante do plan ante a Administración.

3. **Xunto coa solicitude** deberá achegarse a proposta do plan de xestión e os correspondentes anexos unidos nun único arquivo .pdf

A proposta debe cumprimentarse de acordo co indicado neste circular, achegando os anexos que se vaian indicando en cada apartado.

Na web disporase dos anexos normalizados para os seguintes apartados:

- Anexo de obxectivos para os plans de xestión de nova incorporación. Na web están dispoñibles as guías de elaboración deste apartado.
- Anexo relativo aos indicadores ambientais: Anexo 5.2.1. (Táboa de avaliación da información ambiental do plan: Anexo FEMP 11.1).

Lémbrese que o tamaño máximo do conxunto de documentos achegados nunha solicitude na SEDE electrónica é de 50 MB, e non se admiten arquivos comprimidos

4. Os plans para as zonas de autorización e para as zonas de libre marisqueo presentaranse separadamente.

5. Os plans específicos de xestión para as zonas de libre marisqueo deberán incluír o informe das entidades interesadas na mesma zona de traballo.





6. No caso do marisqueo a pé poderán incorporarse especies accesorias ás principais incluídas nos plans de xestión (gasterópodos, solénidos).

7. En todo caso os plans presentados deben incluír a documentación que acredite que foi aprobado pola agrupación sectorial, de estar constituída, e que recibiu o informe ou a aprobación, segundo o caso, do órgano competente da entidade asociativa.

No suposto de que existan diferenzas entre a proposta do órgano da entidade asociativa con respecto ao plan aprobado pola agrupación sectorial, estas deberán especificarse e xustificarse co obxecto de poder valorar ambos plantexamentos.

8. Os plans de xestión, ben sexan presentados por unha soa entidade ou sexan conxuntos, reflectirán os acordos existentes entre confrarías/entidades que podan afectar a calquera punto do seu contido, e en particular ás zonas de traballo e aos participantes.

9. As entidades diferentes das confrarías definidas no artigo 3.7 do Decreto 153/2019, do 21 de novembro e que previamente non sexan titulares dun plan de xestión, deberán presentar os seus estatutos.

10. Nas propostas de plan de nova incorporación deberán figurar todos os contidos establecidos para os plans de xestión que figuran no anexo do Decreto 153/2019, do 21 de novembro.

B. SOBRE OS CONTIDOS DO PLAN:

1. OBXECTIVOS DO PLAN

De acordo co establecido no Decreto 153/2019, do 21 de novembro, na proposta do plan deberá achegarse a definición dos obxectivos biolóxicos, ecolóxicos e socioeconómicos xerais do plan, xunto cos respectivos obxectivos operacionais indicadores, niveis de referencia e estratexias para acadar os valores obxectivo mediante o desenvolvemento do plan.

En <https://mar.xunta.gal/gl/o-mar/o-sector/plans-de-xestion-e-biodiversidade> atópanse as guías de orientación para facilitar o cumprimento deste apartado, para o que se poderá achegar cuberto e impreso o anexo **Obxectivo xerais do plan** xunto coa proposta.

No plan deberán ficar definidos obxectivos xerais de cada tipo (biolóxico, ecolóxico e socioeconómico) . En todo caso deberá definirse algún obxectivo biolóxico en base á saúde dos stocks explotados e/ou na avaliación do volume do stock das especies.





2. PARTICIPANTES NOS PLANS DE XESTIÓN

Deberá indicarse o número de participantes e presentar en anexo a relación actualizada de todos os permisos de explotación, embarcacións (nome, armador e matrícula) que participen no plan.

Cómpre recordar que o censo de participantes no plan de explotación é responsabilidade da entidade titular do plan.

A entidade só propondrá o número de participantes (mariscadores/ as a pé/embarcacións - habilitacións) no plan de xestión cando non estean outorgados títulos habilitantes.

3. AVALIACIÓN DOS RECURSOS

3.1 Para unha avaliación completa do recurso incluírase a seguinte información:

- a) Estudos realizados, datas de mostraxe e tipo de mostraxe realizada.
- b) Metodoloxía da mostraxe ou estimación do stock, metodoloxía para a estimación do stock comercial probable e da estimación de capturas para o ano de vixencia do plan.

3.2 Nos plans de nova incorporación a avaliación do recurso será un requisito necesario para valorar a solicitude presentada.

4. PLAN DE EXTRACCIÓN E MEDIDAS DE CONSERVACIÓN

Ámbito do plan e zonas de traballo

4.1. Os plans de xestión de nova incorporación deberán contar polo menos cunha area ou banco principal de traballo que xustifique a súa entidade separada dos plans de xestión marisqueira xa aprobados na zona.

Se se trata de zonas ou bancos en zonas de libre marisqueo deberá incluírse o informe das entidades que podan estar interesadas na mesma zona de traballo.

4.2. Na proposta deberán aparecer claramente identificados o ámbito do plan, os bancos, as especies e superficies que se pretenda explotar. Os bancos identificaranse co nome local e co código asignado en Sigremar, de ser o caso

No caso de que a zona de traballo se subdivida en sectores recoméndase o uso dos números arábigos (1, 2, ...) en lugar dos números romanos (I, II,...) para a denominación das subzonas de traballo.





4.3. Os mapas dispoñibles na páxina <http://ww3.intecmar.gal/Sigremar/> son os que deben incorporarse aos plans de xestión como anexo, de ser o caso. Para facilitar a súa consulta deben imprimirse na capa Galicia con indicación da toponimia e os códigos dos bancos.

4.4. Para a incorporación de bancos aínda non definidos no plan: Indicarase a proposta de nome para o banco e as especies existentes, e presentarse unha avaliación do recurso, así como se achegaran as coordenadas cartográficas e DATUM que define os vértices dos novos bancos.

Unha vez aprobado o plan de xestión, o servizo de Xestión dos Recursos Marisqueiros daralle traslado ao servizo de Planificación para a súa visualización en Sigremar.

4.5. No caso de plans específicos en zonas de libre marisqueo: indicarase que medidas de conservación propostas supoñen unha mellora significativa na explotación dos bancos naturais, de acordo co establecido no artigo 10 do Decreto 153/2019, do 21 de novembro.

4.6. Deberá facerse especial atención a que non existan solapamentos cos ámbitos de traballo doutros plans de xestión.

4.7. No caso de plans de xestión a pé, a entidade indicará as zonas de reserva para a extracción de poliquetos polos pescadores de lecer, anexando a cartografía de ditas áreas.

4.8. Horario de traballo

Indicarase o horario proposto para desenvolver a actividade extractiva.

4.9. Uso de artes

Cando se pretendan establecer restricións ao uso dunha arte autorizada no que respecta á zona e/ou á época do ano na que se vaia a empregar ou usar unha arte con características máis restritivas (p.e. maior separación entre variñas do raño) que as establecidas na normativa, deberá xustificarse motivadamente para que dita solicitude poda ser valorada polo persoal técnico.

4.10. Tamaño mínimo de extracción e comercialización

Cando se pretenda establecer unha tamaño mínimo de extracción e comercialización superior ao contemplado na normativa vixente, deberá indicarse no plan de xestión.

No caso do tamaño mínimo de extracción da ameixa babosa, seguirase o disposto na disposición adicional única da Orde do 27.7.2012, pola que se regulan os tamaños mínimos de diversos produtos pesqueiros na Comunidade Autónoma de Galicia.

4.11. Calendario do plan

Deberá facerse con base no o estado dos recursos e nas necesidades do sector.





De ser o caso, indicárase a previsión de realizar actividade extractiva en xornadas diferentes das de carácter xeral (de luns a venres), de acordo co establecido no artigo 6 do Decreto 153/2019, do 21 de novembro.

4.12. Puntos de control

Os puntos de control son elementos importantes no plan de explotación. Polo tanto, deberá indicarse:

- 1) A súa ubicación (presentarase anexo coas coordenadas xeográficas da situación dos puntos de control, plano da súa localización e descrición dos límites no caso de ser necesario)
- 2) As persoas responsables e sistema de funcionamento, Incluindo:
 - Responsables e participantes no punto de control
 - Carácter permanente ou rotatorio das persoas no punto de control
 - Elección e comunicación ás persoas interesadas
 - Control das persoas destinadas ao punto de control
 - Número das persoas que participan nos puntos de control
 - Horarios
 - Sistema de transporte do marisco da zona de produción-punto de control á lonxa
 - Sistema de control dos topes de capturas e tamaños (manual, con clasificadora ou ambos)
 - De ser o caso, compensación das persoas que participan nos puntos de control
 - Breve descrición de outra información de interese que se considere.

5. ACCIÓNS DE CONSERVACIÓN, MANTEMENTO, RECUPERACION OU MELLORA DOS HABITATS E ZONAS DE PRODUCCIÓN

Deberán definirse o tipo de actividade, as épocas e zonas de actuación previstas, así como a metodoloxía a empregar.

Cando se desenvolvan accións de conservación, mantemento, recuperación ou mellora dos hábitats e zonas de produción debe indicarse se os traballos son obrigatorios e se computan para a renovación do permiso de explotación de marisqueo a pé.

No plan de xestión incluírase una breve descrición dos seguinte apartados:

- Persoas responsables da organización dos traballos
- Sistema para establecer as quendas dos traballos
- Forma de comunicación dos traballos aos interesados





- Forma de control da realización dos traballos
- Sistema de xustificación para as persoas que desenvolvan os traballos

As accións de control de depredadores ou especies exóticas invasoras deberán figurar axeitadamente planificadas na proposta de plan, debendo figurar como mínimo a metodoloxía, zonas, épocas, especies obxecto de control.

6. ACCIÓNS DE COIDADO, CONTROL, SEGUIMENTO, PROTECCIÓN E VIXILANCIA DOS BANCOS MARISQUEIROS:

Cando se desenvolvan accións de, control, seguimento protección e vixilancia dos bancos marisqueiros debe indicarse se os traballos son obrigatorios e se computan para a renovación do permiso de explotación de marisqueo a pé.

No plan de xestión incluírase una breve descrición dos seguinte apartados:

- Persoas responsables da organización dos traballos
- Organización dos traballos de vixilancia profesional
- Vixilancia informativa polos mariscadores:
 - Épocas
 - Sistema de establecemento das quendas de traballos
 - Forma de comunicación dos traballos aos participantes
 - Control da realización dos traballos polos interesados
 - Sistema de xustificación para as persoas que desenvolvan os traballos

7. INFORMACIÓN AMBIENTAL DO PLAN

No plan incorporárase información relativa aos indicadores que se empregarán para avaliar a consecución do bo estado ambiental da zona, de acordo coa directiva marco da estratexia mariña (DMEM) e coas actuacións de protección e recuperación da biodiversidade contempladas no FEMP.

A información contida nos indicadores e os resultados poden ser entregados ao longo do ano de vixencia dos plans de xestión. Deste xeito, os resultados dos indicadores e a información asociada non serán incluídos nos plans de xestión. No seu lugar, incluírase unha Avaliación da Información





Ambiental do plan en forma de táboa resumo dos indicadores completados ata a data de presentación do plan e dos que se completarán ao longo do período de vixencia desta.

Lembrase que cando se cumprimente a táboa relativo ós indicadores ambientais (anexo 5.2.1) non se cubran os cadros sombreados.

8. PERSPECTIVA SISTÉMICA

Indicarase a relación do plan con cada un dos compoñentes da perspectiva sistémica: biodiversidade, uso do territorio, cambio climático e infraestrutura verde (azul, no medio mariño).

No enlace á web da consellería do Mar indicado ao inicio deste documento figura unha guía para a valoración da perspectiva sistémica dos plans de xestión, que contén o marco conceptual de cada un dos catro compoñentes da perspectiva sistémica. Na guía inclúense as definicións dos diferentes conceptos, así como as variables de cada concepto a ter en conta á hora de avaliar os plans dende o punto de vista da perspectiva sistémica.

Na guía de avaliación da perspectiva sistémica tamén se amosan algúns exemplos de accións tipo dentro dos plans de xestión. Non se trata dunha revisión exhaustiva senón de amosar exemplos de aplicabilidade da guía ás accións máis comúns que poderían conter os plans de xestión.

9. ACCIÓNS FORMATIVAS PARA UNHA MELLOR XESTIÓN E CONSERVACIÓN DOS RECURSOS

Na proposta poderase contemplar a realización de accións formativas par unha mellor xestión e conservación dos recursos marisqueiros, así como actividades de diversificación da actividade marisqueira.

10. ACTIVIDADES DE DIVERSIFICACIÓN DA ACTIVIDADE MARISQUEIRA COA FORMULA DE TURISMO MARIÑEIRO.

No caso de realizarse **actividades de turismo mariñeiro** ao abeiro do plan farase unha descrición das actividades que se pretenden desenvolver.

11. PLAN FINANCEIRO

O plan financeiro reflectirá os gastos e ingresos necesarios para as actuacións incluídas no plan de xestión, é dicir, para o sostemento do plan e, polo tanto, para a súa viabilidade.

Se as entidades deciden establecer cuotas para o sostemento do plan, estas deberán vir recollidas no plan financeiro.





12. VALORACIÓN

12.1 As xefaturas territoriais emitirán propostas avaliadas dos plans de xestión que remitirán por correo electrónico ás entidades, que poderán **achegar alegacións ao Servizo de Xestión dos Recursos Marisqueiros á seguinte dirección: servizo.marisqueo@xunta.gal**.

12.2 Cando os contidos dos plans de xestión non se axusten ao disposto na normativa vixente, ou non sexa viable por contradicir os criterios do persoal técnico da administración, poderán introducirse as modificacións que se estimen oportunas, para acadar unha máis racional explotación dos recursos.

A directora xeral de Desenvolvemento Pesqueiro

Susana Rodríguez Carballo
(Sinatura electrónica)

